



**PRIMEIRO
MINISTRO**

**DISKURSU
SUA EXCELÊNCIA PRIMEIRO-MINISTRO NIAN
DR. RUI MARIA DE ARAÚJO
IHA OKASIAUN 15º ANIVERSÁRIU
POLÍCIA NASIONAL TIMOR-LESTE**

Sentro Formasaun Polícia iha Komoro, Díli
27 de Março de 2015



Palácio do Governo,
Avenida Presidente Nicolau Lobato,
Díli, Timor-Leste

Sua Excelência Presidente Parlamentu Nasional
Senhor Dr. Vicente da Silva Guterres

Sua Excelência Presidente Tribunal Rekursu
Senhor Dr. Guilhermino da Silva

Exmo. Ministru Interior
Senhor Dr. Longuinhos Monteiro

Exmo. Chefe Estadu Maior General das F-FDTL
Senhor Major General Lere Anan Timur

Distintos Membrus Parlamentu Nasional no Governu
Exmos. Senhores Representantes Korpu Diplomátiku
Ilustres Konvidadus

Exmo. Komandante Geral Interino da PNTL
Senhor Komisário Afonso de Jesus
Senhores Komandantes Emposadus

Exmos. Comandantes Unidades no Xefes Serviços PNTL

Exmos. Oficiais, Sargentus no Agentes no Funcionários Sivos PNTL,

Onra no privilejiu ida mai hau, marka prezensa iha serimonia komemora Desimu Kintu Aniversariu Polisia Nasional Timor-Leste nian, eventu ida ne'ebé signifikadu boot tebes ba Timor Oan hotu-hotu.

Tanba ne'e, no uluk nanain, hau fo Parabens ba PNTL tomak, hanesan instituisaun no hanesan individu ne'ebé iha instituisaun ne'e nia laran!

Hau aproveita oportunidade ida ne'e atu testemuño fo publiku ida, nu'udar hau nia rekoñesimentu ba servisu ne'ebé halao tiaona iha âmbito dezvoltimentu no konsolidasaun ita nia PNTL nian.

Seguransa no sosiedade demokratiku, buat rua ne'ebé susar atu ita hafahe tanba seguransa maka elementu esensial ida tebes, husi konfiansa ba intituisaun, konfiansa ba autoridade Estadu, no konfiansa iha Estadu ninia kbít atu prevene no reprimi kriminalidade, iha âmbito respeito ida ne'ebé eskrupulozu duni, ba liberdade, direiro no garantia sidadaun sira nian.

Forsa Seguransa nia responsabilidade dahuluk, maka atu hare ba protesau timor oan sira nian, noa tanba ida ne'e, sira merese ita nia respeito tomak. Se progresu barak alkansa tiaona durante ezistencia tinan sanulu-resin-lima PNTL nian, ita prezisa moos rekoñese katak sei prezisa desenvolve liu tan, iha sosiesade nia laran, kultura ida ne'ebé solidariedade no seguransa, kultura ida ne'ebé ita hotu iha responsabilidade atu hamosu.

Señora no señor sira,

Seguransa maka buat murak ida, ne'ebe mai husi ema hotu-hotu no ba benefisiu ema hotu nian!

Ita hotu tenki kontribui ba ordem no tranquilidade publika no ba prevensaun husi kriminalidade. Ida ne'e dever sidadania nian, ho intensidade ne'ebé depende, naturalmente, husi ita ida idak ninia funsaun iha sociedade nia laran. Iha kondusaun politika seguransa, kompete ba Governu no Ministeriu Interior, atu garante organizasaun no funksionamentu ne'ebé loos, husi sistema seguransa interna. Forsa ka Servisu Seguransa iha dever atu dezenvolve atividade operacional ne'ebé indispensavel hodi mantein paz iha publiku.

Husi Instituisaun hotu ne'ebé garante seguransa ba Timor-oan sira, PNTL iha papel importante ida atu dezempeña tanba natureza diversifikada iha kompetensia ne'ebé nia ezerse, loron loron, no iha teritoriu nasional tomak.

Fundamental tebes PNTL ninia dedikasaun ba kauza peblika, no ninia hakbesik-an ba populasau, no tanba ida ne'e, ninia atuasaun tenku koezu, ka tenki metin/la naksobu, no tenki proffesional. Izensaun, politika no sosial, rigor ho disiplina husi ajente polisia hotu, indispensavel tebes ba PNTL ninia kredibilidade, no sensasaun paz no seguransa iha ita nia sociedade laran.

Kabe ba Estadu, liu liu ba Governu, atu transfere aptidaun no kapasidade hodi fo ba Forsa Defeza no Seguransa, meius nebe sira nesesita. Iha tinan hirak ikus ne'e, ita raforsa kresimentu institusional PNTL nian, no ita hari'i Instituisaun Polisial ida ne'ebé iha liu tan kbiit, atu kumpri ninia misaun, hodi fo importansia liu, ba prevensaun no polisiamentu komunitariu, no iha kbiit atu uza deit forsa, wainhira presiza duni, ho ihas kuadru legal ida ne'ebé estebelese tiaona.

Lo'os duni, iha tinan hirak ikus-liu, PNTL hetan rezultadu ne'ebé diak iha nível produitu operacional no valorizasaun institusional, nu'udar rezultadu husi nesesidade ba dezenvolvimentu no konsolidasaun, ne'ebé konjuga ho aumentu husi kapasidade iha âmbito esperiensia no koñesimentu nian.

Ohin loron, wainhira ita koalia kona-ba redusaun nível kriminalidade partisipada, kona-ba redusaun tipu violentu liu no grave, kona-ba manutensaun ordem publika, kona-ba diminuisaun sinistralidade rodoviaria, kona-ba projetu inovador ne'ebé iha susesu iha apoio ba labarik no feto ne'ebé sai vítima ba violensia domestika, no mos kona-ba kombat ba sira nia agresor sira, kona-ba partisipasaun iha misaun internasional, hanesan Guine Bissau, koba-ba seguransa iha período eleisaun, kona-ba programa especial polisiamentu komunitariu, ita koalia kona-ba PNTL ninia kontributu ne'ebé notável tebes, atu mantein Timor-Leste nu'udar país ida ne'ebé oferese garantia liberdade no seguransa ba ninia sidadau rasik, no mos ba ninia bainaka sira.

Motivu seluk ba ita nia orgulhlu moos, relasiona ho partisipasaun iha forum internasional, kazu Komunidade Paizes Lingua Portuguesa, PNTL assume tiha ona, no sei assume la kleur tan, Prezidencia Konsellu Xefi Polisia Komunidade Paiz Lingua Portuguesa sira nian.

Maski nune'e, rezultadu hirak ne'e sei la mosu, wainhira laiha komprometimentu ne'ebe a'as, empenhu ne'ebe esepcionãl, no atensaun partikular ne'ebe anterior Ministro Defeza no Seguransa, Kay Rala Xanana Gusmão, eis-Sekretariu Estadu Seguransa, Sr. Francisco Guterres, no Ministru Interior atual, Dr. Longuinhos Monteiro, sira hotu empresta ba prosesu tomak dezenvolvimentu no konsolidasaun Forsa Seguransa, wainhira halao sira nia kna'ar iha I,II, III, IV no V Governu Konstitusional.

Hau hakarak husik hela lia-fuan rekoñesimentu espesial ida ba Dr. Longuinhos Monteiro, tanba nia dezempenhu profissional, no tanba kualidade extraordinaria no kompetensia profissional ne'ebe nia hatudu durante besik tinan neen, ne'ebe nia ezerse iha kargu a'as no kompexu tebes nu'udar Komandante-Jeral PNTL, ne'ebe foin dadauk nia tenki husik hela, hodi ezerse fali kargu nu'udar Ministru Interior. Tanba ne'e, hau hakarak agradese hodi Governu nia naran, servisu hirak ne'ebe nia presta ona ba PNTL no ba Nasaun tomak. Hau fiar katak ninia susesor, Sr. Julio Ornay, sei kontinua ninia obra no susesu wain tebes, iha futuro.

Hau hakarak hato'o mos lia fuan balun ba Komisariu Afonsu de Jesus, tanba ninia espiritu misaun no sentidu atu servi, tanba ninia dedikasaun disponibilidade tomak ho kualidae a'as husi ninia dezempenhu profisional iha prosesu rekonstrusaun no dezenvolvimentu PNTL nian.

Hau agradese no felisita moos ba parseiru dezenvolvimentu sira, espesialmenta parseiru bilateral sira: ita boot sira hotu ninia kontribuisaun tebes iha prosesu dezenvolvimentu no kosolidasaun PNTL nian. *I would also like to express my gratitude and praise all development partners, particularly the bilateral development partners: your contribution has been and is proving to be of invaluable importance to the development and consolidation of PNTL.*

Ofisiais no Agentes PNTL nian,

Hau hakarak hato'o ba ita boot sira, hau nia rekoñesimentu ba esforsu no sakrifisiu tomak, ne'ebe ita boot sira halo, wainhira kumpri ita boot sira nia misaun. Hau hakarak fo destake espesial ba hirak ne'ebe hatudu komportamentu ne'ebe profissional, ho baze ba kultura profesionalizmu, kultura kompetensia, kultura empenho no dedikasaun, ne'ebe hatur metin iha valor hirak ne'ebe karateriza ita boot sira nia instituisaun; **Disiplina, Honra no Dever.** Ba hirak ne'ebe ohin iha ne'e hetan kondekorasaun, hau husik hela liafuan espesial ida moos, ba ita boot sira nia empenhu, dedikasaun, profesionalizmu, ne'ebe ita boot sira hatudu ona, wainhira halao ita boot sira nia kna'ar.

Tenki banati tuir ezemplu ne'ebe diak, no haberan ba membru PNTL hotu-hotu, hodi hamosu PNTL ida ne'ebe omogénio, uniforme, onradu, no hetan respeitu husi komunidadade ne'ebe imi pertensa ba.

Hau aproveita oportunidade, iha loron aniversáriu PNTL nian, atu lansa fila fali dezafiu ba dezenvolvimentu ne'ebe boot liu tan, iha area tolu ne'ebe konsidera nu'udar perioridade, hanesan Polisiamentu Komunitáriu, Kontrolo ba Fronteiras (terrestre no marítima) no Seguransa Rodoviaria.

Lei Organika PNTL nian defini katak, kona-ba estratejia no filosofia polisiamentu, PNTL reune karateristika polisia komunitaria ida nian. Ida ne'e signifika polisia tenki integra-a'an didiak iha komunidadade lokal, hodi fo prioridade ba *polisiamentu de proximidade*, katak tenki iha kontaktu permanente ho populusaun. Ho ida ne'e deit maka bele identifika probleme ne'ebé afeta ema nu'udar individu, no mos komunidadade, no bele hatene konfliktu saida deit maka influensia situasaun seguransa iha komunidadade nia leet, hodi nune'e bele foti medidas ne'ebé adekuadu atu komunidadade bele moris iha paz no hakmatek nia laran.

Ohin ita assiste moos nomeasau no pose ba Komandante-Jeral no 2º Komandante-Jeral foun PNTL nian, nu'udar pasu ida tan ba desenvolvimentu instituisaun ida ne'e, no liu -liu nu'udar sinal konfiansa, ne'ebé depozita iha Ofisial Superior sira husi Instituisaun ida ne'e, no hanesan moos aposta ida iha lideransa ne'ebé forte, no bele halaó disciplina iha PNTL nia laran.

Ba Komandante-Jeral no 2º Komandante-Jeral foun PNTL Komisariu Julio Hornay, no Komisariu Faustino da Costa, hau dezeja felisidades iha funsaun importante, ejijente no difisil, ne'ebé ita boot nain rua hetan fiar atu halao.

Ita hotu nia seguransa depende ita boot sira nia susesu. Ita boot sira nia susesu sei determina ita hotu nia seguransa.

Hau fiar metin katak PNTL ninia membru hotu-hotu, sei nafatin hatudu sira nina kapasidade, sira nia dedikasaun, atu garante katak timoroan hotu hotu bele nafatin moris iha liberdade no seguransa nia laran.

Hau iha konfiansa tomak ba PNTL ho nia determinasaun hodi asegura neutralizasaun ba ameasa no kumprimentu ba sira ninia misaun, ne'ebé esensial tebes ba sociedade demokratika ida ne'ebe hatu'ur-a'an metin, iha Estado Direitu niania mahan.

Hau hakotu iha ne'e, hodi hato'o ba PNTL hau nia felisitasoens ba ita boot sira nia tinan sanulu resin lima, no hato'o mos hakuak boot konfiansa no serteza iha futuru ne'ebé diak liu, ba membro PNTL hotu ne'ebé namkari iha Timor-Leste laran tomak.

Dala ida tan hau nia parabens, no votus susessu ba ita boot sira hotu.

Obrigadu wa'in

27 de Março de 2015
Dr. Rui Maria de Araújo